

Siunnersuut uunga: Eqqissimatitsisarneq aamma aallatigut kulturikkut eriajisassanik kulturikkut kingornussatut illersuineq pillugu Inatsisartut inatsisissaat.

(Kultureqarnermut, Ilinniartitaanerermut, Ilisimatusarnermut Ilageeqarnermullu Naalakkersuisoq)

Saqqummiussissut**Siullermeerineq**

Naalakkersuisut sinnerlugit matumuuna saqqummiutissavara Eqqissimatitsisarneq aamma aallatigut kulturikkut eriajisassanik kulturikkut kingornussatut illersuineq pillugu Inatsisartut inatsisissaattut siunnersuut.

Inatsisartut 2009-mi ukiakkut ataatsimiinneranni suliarisassanngorlugu Naalakkersuisut saqqummiuppaat Kulturikkut eriajisassat eqqissimatitaaernerat pillugu Inatsisartut inatsisaata nr. 18, 19. november 2007-imeersup, Inatsisartut 2007-imi ukiakkut ataatsimiinnermini akuersissutigisaata allanngortinneqarnissaanik siunnersuut. Siunnersuutip siullermeerutaasumik oqaluuserineqarnissaa sioqqullugu Naalakkersuisut aalajangiussipput siunnersuut tunuartikkumallugu siunniunneqarluni Inatsisartut 2010-mi upernaakkut ataatsimiinnissaannut siunnersuummik suliareqqitamik saqqummiussinissaq.

Siunnersuutip tunuartinneqarnissaanut Naalakkersuisut aalajangiussinerannut tunuliaqutaavoq, alumiiniuliorfissamat pilersaarut ingerlasoq tunngavigalugu Naalakkersuisut naliliimmata, inatsisip atuuttup arlaqarnerusunik allannguuteqartinneqarnissaa pisariaqartinneqassasoq, allannguutissallu peqqissaartumik piareersarnissaanut tusarniaassutigineqarnissaanullu piffissaq naammattoq pisariaqartinneqassammat allannguutissanik saqqummiussinissaq Inatsisartut 2009-mi ukiakkut ataatsimiinneranni suliarisassanngorlugu naammassineqarsinnaassanngitsoq.

Naalakkersuisut naliliipput naleqquttuussasoq, eqqissimatitassanngortitsinissamik eqqarsaataasut politikkikkut suliarineqarsinnaanissaat periarfissikkaanni, inuiaqatigiit ineriartortinneqarnissaat eqqarsaatigalugu tamanna pisariaqartinneqarpat.

Tamatuma malitsigisaanik Naalakkersuisut aalajangiussipput suleqatigiissitaliortoqassasoq naalakkersuisoqarfinit susasaqartunit allanillu attuumassuteqartunit ilaasortalersorneqartumik, suleqatigiissitalu suliarissallugu Kulturikkut eriajisassat eqqissimatitaaernerat pillugu Inatsisartut inatsisaata allannguutissaanut siunnersuussiornissaq, siunnersuutissamilu Naalakkersuisut pisinnaatinneqassallutik inuiaqatigiit ineriartortinneqarnissaat eqqarsaatigalugu tamanna pisariaqartinneqarpat inatsimmik avaqqutsinnaanissamik, aammalu peqatigitillugu inatsimmut tunngaviusut sapinngisamik annertunerpaamik mianeralugit, tamatumunnga ilanngullugit kulturikkut kingornussanit paasissutissanik uppernarsaatissanillu katersinissamik suliniutinik aallartitsinissamat iluaqutaasussat.

Tamanna aallaavigalugu inatsisissamik piareersaaneq aallartinneqarpoq siunnersuummik suliareqqitamik Inatsisartut 2010-mi upernaakkut ataatsimiinneranni saqqummiussinissaq siunertaralugu. Naleqquttuusorineqarsimavoq suliaassat agguataarsimanerat atuuttoq aallaavigalugu siunnersuutissamik suliaqarneq Kultureqarnermut, Ilinniartitaanerermut, Ilisimatusarnermut Ilageeqarnermullu Naalakkersuisoqarfimmit suliarineqarpat, aammalu suleqatigiissitanik pilersitsinani aaqqissueqatigiittussanik pilersitsisoqarpat. Inatsisartut inatsisissaannut siunnersuut

tusarniaassutigineqartoq taamaalilluni naammassineqarsimavoq naalackersuisoqarfiup aaqqissueqatigiitussaaitaasullu suleqatigiilluaqqissaarnerisigut.

Ataatsimut isigalugu Kulturikkut eriagisassat eqqissimatitaaanerat pillugu Inatsisartut inatsisaannut (Inatsisartut inatsisaat nr. 18, 19. november 2007-imeersoq) atuuttumut sanilliullugu allannguutit pingaarnerit marluupput.

Allannguutit pingaarnerit aappaa siulleg tassaavoq periarfissaqalermat, immikkorluinnaq pisoqartillugu Naalackersuisut aalajangiisinnaanngorlutik eqqissimatitassanngortitsinissamik allatulluunniit kulturikkut kingornussatut illersugassanngortitsinissamik pilersaarummik illuartitsisinnaallutik inuiaqatigiit ineriartortinneqarneranni ataatsimoornerusumik isiginnilluni pingaartittariaqartut tunngavigalugit.

Inuiaqatigiit ineriartortinneqarneranni ataatsimoornerusumik isiginnilluni pingaartittariaqartut tunngavigalugit Naalackersuisut aalajangiisinnaanermut periarfissariligaat eqqarsaatigineqarpoq allanik periarfissaalatsinermi atugassatut Inatsisartut inatsisaata siunertarisaa ataqqiuaannarumallugu, tassalu kulturikkut eriagisassat tassaasut Nunatta kulturikkut kingornussassiaasa ilagisaat Nunattalu oqaluttuarisaaneranik paasinninnisamut tapertaasut. Ilutigitillugu pisariaqartinneqarpoq, allatut periarfissaalatsinermi aaqqiissutissaq alla pitsaanerpaamut tulliusoq qulakkeerneqassasoq. Taamatut qulakkeerinninneq tassaassaaq, allatut aalajangiisariaqalernermi kulturikkut eriagisassap aamma ilisimasat paasissutissallu kulturikkut eriagisassap imarisaasa sapinngisamik pitsaanerpaamik uppersaasorsorneqarnissaat. Taamaattumik siunnersuummi Naalackersuisut pisussaatinneqarput inuiaqatigiit ineriartortinneqarneranni ataatsimoornerusumik isiginnilluni aalajangiinermut atatillugu ilanngullugu aalajangersaaffigissagaat, qanoq iliornikkut qulakkeerneqassasoq, kulturikkut eriagisassap aamma ilisimasassat paasissutissallu kulturikkut eriagisassap imarisaasa sapinngisamik pitsaanerpaamik uppersaasorneqarnissaat.

Allannguutit pingaarnerit aappaat tassaavoq allatigut kulturikkut eriagisassanik illersugassanngortitsininaanermik eqqussineq sumiiffinnik kulturikkut oqaluttuarisaanermut pingaarutilinnik eqqissimatitassanngortitsisarnermut sanilliullugu. Inatsisartut inatsisaat atuuttoq tunngavigalugu allatigut kulturikkut eriagisassanik illersugassanngortitsininaanermut periarfissaqanngilaq taamaallaat eqqissimatitassanngortitsininaaneq. Tamanna ajornartorsiutaalersussaavoq UNESCO-p nunarsuarmioqatigiinnut kingornutassiatut allattugaataanut sumiiffinnik ilanngutitsiniarluni kissaateqarnermi aammalu sumiiffinnik allanik kulturikkut kingornussatut allatut illersugassanngortitsiniarniarluni kissaateqarnermi.

Siunnersuummi eqqunneqarpoq ”allatigut kulturikkut eriagisassanik kulturikkut kingornussatut illersuineq” eqqissimatitassanngortitsisarnermut tapertatut. Inatsisartut inatsisaata illunik aammalu sumiiffinnik kulturikkut pingaarutilinnik eqqissimatitassanngortitsisarnermut aalajangersagai imaalillugit avissaartinneqarput, pineqartut tamarmik immikkoortunik eqqissimatitassanngortitsisarneq pillugu aalajangersaaffigineqarlutik.

Taamatut oqaaseqaateqarlunga siunnersuut Inatsisartunit akuersaarneqarnissaa neriutugalugu suliarisassanngortippara.